

Kei Hea Tō Kāinga?

nā Heni Turner rāua ko Julie Ellis


Atakura

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. Titiro ki ngā kāinga o ngā manu. Ko tēhea te manu pai rawa ki a koe? Pānuitia i roto i te pukapuka *Kei Hea Tō Kāinga?*



He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te mōhiotanga o te ākonga ki ngā manu māori.

Matapakia te mōhiotanga o te ākonga ki ngā taiao noho o ētahi manu māori.

Kōrerorerotia te meka kei ia momo manu tōna ake taiao noho.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Ko wai ngā ingoa o ētahi o ngā manu i roto i te pukapuka?
2. Ko wai te manu pātaitai i roto i te pukapuka?
3. E hia ngā taiao rerekē o ngā manu i roto i te pukapuka?
4. Ki ōu whakaaro, he aha i kore ai tētahi o aua manu i noho ai i te tāone?
5. Ki ōu whakaaro, nā te aha te kaituhi i whakarite ai kia āhei ngā manu ki te kōrero?

Ngā whakautu ki ngā whakapuaki māramatanga

1. Ko Tūi, ko Kea, ko Takahē, ko Kōtare, ko Piwaiwaka, ko Mohua, ko Pūkeko, ko Kāhu, ko Kāmana, ko Hoiho, ko Taraiti.
2. Ko Tūi.
3. Tekau.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

T He tipako mōhiohio mai i te pukapuka.

He whakatakinga ā-roto, he whakaharatau

I mua i te pānui i te pukapuka, matapakia ngā wāhi noho o ētahi o ngā manu mā te whakamahi whakaahua. Kōrerorerotia ngā hononga o ngā taiao noho ki ngā āhuetanga ā-tinana (hei tauira: te roa o ngā waewae, te roa o te ngutu, te aha, te aha).

Kia oti i te ākonga te pukapuka te pānui, matapakia ngā āhua o ngā taiao noho. Matapakia ngā mōhiohio hou i kitea e te ākonga i roto i te kōrero.

Kōrerotia te kōrero pūrākau mō te wehenga o ngā manu o te tuawhenua me ngā manu o te moana.

Kōrero mō ngā manu hekeheke, neke atu i te kōtahi o rātou kāinga (hei tauira: te kūaka, te pīpiwharauora).